

m'uyut bnu' wagi' na yaya' maku'

“aya’! aya’! cyux su’ inu? ima’ cyux smbeshu?” ryax nasa ga, ana si kgiq giq mqwalax ru msbehuy qu kayal ga, ini’ balay thyazi smru’ qu qслиq maku’. si saku tpaq’ kintari sa rima m’slaq ka gleng buqul ni yaya’ mu ru, si saku’ ml’ax m’ngwi ngwi mngilis, ini’ balay baqi smpung kinm’uy na qsahuy maku’. si ktehuq squ sman lga, memaw mkruy kwara qu hi’ mu lru, si mu hluzi qu rima’ mqarus ka hi’ mu i musa mngaw squ ngasal.

tgazyaw saku’ sa ’nbyan maku’ lga, nyux si nbah yan ega’ m’bras bras mhtuw qu rqyas na yaya’ mu ru inaras nya ska’ qnxan, pyang balay nyux si trngil squ tunux maku’ ga, yan qutux qutux sasan ini’ klpaw nga, rima’ m’klang klang qu tnobuy. tuliq sami lga, rima’ nya’ suqun sm’an qu bzyoq ru masuq pqcya’ ramat, ru nyux nya’ sraxi tanux uzi qu minhqan na lukus, nyux sa nniqan qu aki’ myan sk’lama’, yaqu yaya’ hya’ lga, rima’ ini’ baqi qu wal nya’ ’san la.

qutux qutux zik na p’muya ru klhan na pagay ga, ana m’keng keng mu’ qu wagi’ ga, yan balay na kikay qu qba’ nya’ i mqumah tmaroq squ rgyax na lituk slaq, ini’ nangi m’is ru agay qu hya’ qani, ana nanu gzihung na zyaw ngasal ga, ini’ nbah mcik ana cikuy qu roziq nya’, mutu nya’ si galiy

sa kinyuhum inlungan nya’ maras squ ngasal qani. nanu kruma’ mutu mu qriqun mita’ yaya’ mu gbyan ga, utux mtbaku’ ru tmlux cyahaw squ blihun tanux i msquli’ mita’ babaw kayal. mnglung saku’ nanak mha, kya cingay balay qu qmtux na qsahuy nya, kya cyux hazi thbku’ pqzyu kin na yaba’ yaya’ nya’ te babaw kayal, mha saku’ mnglung.

zik ’osa yaya’ maki’ squ bzyoing ga, qutux qutux ’san mu smbyes ga, memaw yan nyux btaqan na qzi’ qu qsahuy maku’. ktan nyux si ’buzi na gomu’ kwara qu nqwaq, qolu’ ru nguhuw nya’ lga, ungat balay rngu’ maku’ ms’rux squ beh nya’ mangay, nanu mutu ku’ si pyang mgey tanux msbuq mngilis.

llungun kwara pinhkngyan na k’aya’ mu ga, si saku’ squw nanak mha, talagay! ima’ aki’ thuzay pktehuk squ minkngyan nya’ qani la! spngun kin gnalu’ mu squ yaya’ mu ga, iyat nangi’ ptnaq ana na lilas na kin’uy nya’, mosa nanak kahul squ zzik na qsahuy mu i tegalu’ mha, aba’ kayal, mhway su’ ga swaliy kwara qu kinqihan nya’ ru leqiy inblaq mta’ squ ’tuxan.

媽媽過世的時候

媽！您在哪？誰在陪您？！那天風雨交加，卻無法控制崩潰的心。整個人癱在媽媽墳前嚎啕。媽媽身影如電影般浮現，黎明備餐、餵豬、澆菜、洗衣晾乾等，然起身已不知去向。每當插秧割稻，媽媽的手像機器般除草，未曾喊苦埋怨，堅忍帶領著家。飯後常見母親仰望天空，定有說不出的苦，或許在向天上的父母撒嬌訴苦。

想起母親住院時，滿身插管，我只能假借到外哭泣。憶起母親的典範，肅然起敬，我默默祈求母親回到祖靈懷抱。